

RARI HES. 2
33 (L)

O COLERA DE ZENA

IN AGOSTO 1835.



Se doppo tanti poeti che gh'è stæto,
Che han scritto in un zeneise ben serrôu,
E in paragon de lö no vâo un-na d'æto:
Pû con coraggio me son azzardôu
A trattâ un argomento, che m'ha dæto
O gran flagello ch'emmo assæ provôu:
A penna dunque piggio, e vaddo a scrive
Per quelli che han a sorte ancon de vive.

Ma primma l'è ben giusto che me vorte
A meistro Apollo re dé neûve mûze,
Sebben d'ese di sò mi non ho a sorte,
E o non agge beseûgno de mæ scûze,
Poi, per finila, lê d'in çê che o sciorte
Con un bacco, dixendo che confûze
O l'ha trovôu ë rimme che mi ho scritto,
E con tutte ë mæ ciarle ninte ho dito.

Avanti mi me fô con gran coraggio,
Stæme a senti, Zeneixi, ben attenti:
Sentiei che bella voxe, comme sbraggio,
E con tutta a mæ lengua feûa di denti

(2)

De Colera ve parlo, e ve ghe taggio
Un discorso de giusti sentimenti,
E doppo mi me sciallo che ancon vivo
Me treuvo, e sorve lè aoa ve scrivo.

In quanto a questo poi mi lascio andà,
Solo che se v'avesse aoa da di
E mostràve a burasca ch'è passà,
A saeiva lunga assæ da non finì,
Pe ciù d'un anno avia da poè parlà,
Nisciun ghe saeiva da poè contraddì
Un fæto de disgrazia, e l'è veità,
De questo me n'appello ai cai mæ fræ.

Parlà ve veuggio de questo brutto anno,
Chi è stæto sempre a Zena ghe veddià
Se parziale son mi; ma d'un affanno
Ve parlo che ancon aoa o stemmo a ammià,
Cerchemmo stà lontan da questo danno,
Che porriemo o Segnò ben ringrazià,
E comme sà finia sta brutta scena,
Tutto l'onò avià chi è stæto a Zena.

Ma subito che un caxo s'è sentio,
E qualchedun à Cava gh'ea de fæto,
A vedde tanta gente dìne addio,
E chi in Besagno e chi in Ponçevia andæto,
Che paeiva o mondo zà tosto finio.
E questa a l'è lezion che a nuì n'han dæto
Quelli che se vantavan de talento,
Che scappando sgheùavan comme o vento.

A Zena tutte è ciasse òan piggiæ,
Bascioe, carrosse e cavalli e càri,

(3)

E a ciù parte de gente invexendæ,
Larghè èa diventou scin-na i avari
Che tiavan feùa di muggi de dinæ;
Tutti cercavan fà di groschi sguàri,
Chi vende, chi impegnà, e chi accattava,
Chi se ne stava a Zena, e chi scappava.

O l'èa un invexendo, assæ terrò
De vedde è gran person-ne caminà;
Tempo che non lùxiva ciù de sò,
Se sentiva mai tanti lamentà:
Chi criava e chi ciammava o Segnò:
Gren maòti se veddeivan trasportà
In ti Uspiæ, e appen-na che là intravan
Squæxi se poeiva di che i sotterravan.

Ma poi a tutti piaxe un-na veità;
Non se peù dubbità do gran aggiutto
Prestou a nuì da-e primme Autorità,
Che con gran zelo han provvisto tutto.
O ciù che ha consolou è Sò Maestæ,
Mentre eimo circondæ da pianto e lùtto,
Che essendo chì vegnùo, o s'è mostrou
Comme veo Poæ, e Zena o l'ha aggiutou.

Non basta solo questo; ma zelante
O popolo zeneize, o l'ha ben visto
Quanto per tutti nuì o l'è costante,
Che in quello tempo coscì brutto e tristo
O l'ha fæto de cose proprio sante;
E o posso ben lodà scin-na che existo;
Nuì atri çittadin sempre o lodiamo,
Di soccorsi prestæ non se scordiamo.

(4)

Mille soccorsi ha avùo a povea gente;
In tutti i sei quartè somministravan
Gran roba e di dinæ, se l'èi in mente,
Di lenseù, de coverte scì ghe davan,
E se trovava ancon l'impertinente,
Che o dixeiva che ninte regallavan.
Cessæ, o infami lingue, de parlà,
E imprendeì un-na votta a rispettà.

Che dixesci che o l'èa un gran spavento
Per o popolo afflito e desolòu.
Se veddeivan i Prævi a ægua e a vento
Con o Segnò, e ciù s'è inspaximòu
A gente a quello scimile tormento.
Ma son cöse che han sempre onoròu
Vedde chirurghi e megghi camminà,
E tutti se prestavan pe aggiuttà.

Doppo questo m'affermo de parlàve
Do castigo de Dio che gh'é pù stæto.
Non poemo, o Cittadin, che ben lodàve
Di soccorsi pietosi che n'èi dæto,
E semmo tutti pronti a ringraziàve
De tutte quelle grazie che n'èi fæto:
O Liguri Patrizj, ve meitæ
D'èse per *omnia sæcula* lodæ.

S. P.
Parrucchiere.